

## ORIZONTS

# Cletg e curascha a «da cuminonza a Ruschein»

Cletg e curascha stattan el center dalla proxima occurrenza «da cuminonza a Ruschein - la sera dils treis» – gliendisgis, ils 3 d'avrel 2023. Nus raquintein in a l'auter da muments ed eveniments da cletg ed era da curascha en nossa veta. Raquintar sa tgi che vul. Ei dat ina schinumnada sera da *mi-sa-pa*: mintgin e mintgina sa participar. Mo negin sto. Insa era vegnir a «da cuminonza» e sulettamain tedlar. Quater persunas han gia giu la curascha da raquintar zatgei, quei sco impuls e per animar auters: Las duas persunas las pli veglias che vivan el vitg: *Sep Truog* (92 onns) e *Fidelia Coray-Manetsch* (91). E la scolara ed il scolar da Ruschein che van en l'emprema secundara a Glion: *Nora Baruffol* e *Corsin Klais*. Cun els quater vein nus fatg in video che nus mussein quella sera.

Cletg e curascha ein ingredienzas che s'audan tier mintga veta vivida. Quellas ingredienzas dattan mur e savur a nies mintgagi. Bi eis ei sche cletg e curascha ein en harmonia in cun



**Il quaterfegli sco portacletg.** FOTO MAD

l'autra. Tgi ch'ha curascha ed ughegia, ei leds sche empau cletg vegn aunc vitier per ch'ei reusseschi. E tgi ch'ha cletg e fa zatgei ordlunder drova meinsvart curascha per ch'il cletg porti fretg e svaneschi buca memia dabort. Insa haver cletg e curascha mo per sesez. Insa parter il cletg e schar prender art e part era auters da quel. E puncto curascha vala il medem, cunzun sch'ins s'engascha mintgatun cun curascha per zatgi auter che mo per ins sez.

Historias da cletg e curascha ein dapertut. Nus lein schar reviver ellas alla sera «da cuminonza». Beinvegnidas ein sco adina era persunas d'ordeifer. Suenter l'occurrenza vegn offeriu in sitg – aua ni vin. E l'entrada ei gratuita.

Maria Cadruvi

**Cletg e curascha: Gliendisgis, ils 3 d'avrel allas 20.15, Casa da scola Crestas, Ruschein. Dapli sin [www.dacuminonza.ch](http://www.dacuminonza.ch)**